

# Ársskýrsla 2012

## Hrafnseyri

Skömmu fyrir áramótin 2011/2012 gerði mikið óveður og fannfergi á Vestfjörðum með þeim afleiðingum að rafmagn fór af Hrafnseyri. Stuttu seinna gerði töluvert frost og var þá ákveðið að fá slysavarnarfélagið á Suðureyri til að fara með staðarhaldara yfir Hrafnseyrarheiðina á snjósleða til að athuga hvort ekki væri hiti á húsinu og slá Securitas kerfið inn. Sérstakur hitamælir var settur upp haustið 2012 til þess að láta vita ef hitastig fer niður fyrir ákveðið lágmark. Þær varúðarráðstafanir duga hins vegar skammt einar og sér á meðan hitamælirinn er tengdur við öryggiskerfi Securitas, sem dettur út þegar rafmagnið fer af húsinu.

Fyrstu tvo mánuði ársins var gengið frá, kallað eftir og lokið skráningu á öllum reikningum frá árinu 2011, til þess að forsætisráðuneytið gæti gert upp 200 ára afmælisár Jóns Sigurðssonar áður en það skilaði staðnum í hendur mennta- og menningarmálaráðuneytisins, en samkvæmt ákvörðun ríkisstjórnarinnar tók það við stjórn staðarins frá 1. Janúar 2012 um leið og Hrafnseyrarnefnd, sem hingað til hefur haldið um stjórnvölinn, var lögð niður.

Í mars og apríl vann staðarhaldari við undirbúning að námskeiði Sumarháskólans á Hrafnseyri, sem fólst m.a. í leit að tilboðum fyrir nemendur í rútukeyrslu, matsölu og fleira, auk þess sem tilkynning um námskeiðið var send til allra grunnskóla landsins. Einnig vann staðarhaldari að fyrirlestri, sem hann flutti á Þjóðfélagsfræðiráðstefnu 20. – 21. apríl, við Háskólann á Akureyri. Staðarhaldari flutti svo heimili sitt til Hrafnseyrar í byrjun maí, eins og hann hefur gert undan farin ár.

## Sumarstarfsemin á Hrafnseyri

### Júní

Hrafnseyrarheiði var opnuð sumardaginn fyrsta, þann 19. apríl, og hafði þá verið lokuð frá því í okt./nóv. 2011. Hún lokaðist svo aftur þrem vikum síðar en þá aðeins í einn sólarhring. Það sem helst þurfti lagfæringar við á Hrafnseyri eftir veturinn, voru brotnir girðingastaurar og slappt net á nokkrum stöðum. Einnig hafði lekið vatn inn á gólf sýningarinnar gegnum nýja glervegginn á framhlið hússins.

Vorið og sumarið voru mjög þurr og grasið óx því mjög lítið og hægt. Hins vegar var mikið vökvað umhverfis bæinn og var þá gott að nýr og stærri brunnur hafði verið settur niður vorið áður. Sláttuvélin bilaði einu sinni við sláttinn og ljóst er að hún þarf að fara í klössun næsta haust/vetur. Bíll staðarhaldara bilaði einnig tvisvar sinnum í sumar og þurfti því að hafa bílaleigubíl til taks á staðnum í stuttan tíma.

Safn Jóns Sigurðssonar var opið fyrir gesti 1. júní – 31. ágúst. Áætlað er að heildarfjöldi gesta sem sóttu staðinn heim á þessu tímabili, hafi verið um 5200 manns. Þar af skoðuðu 1.752 gestir safnið, eða um það bil 1/3 af heildarfjöldanum. Þannig hafa komið dálítið fleiri gestir á safnið í ár en heimsóttu það árin 2007 (1.430 gestir) og 2008 (1.566 gestir), en ekki er þó hægt að líkja aðsókn við árið 2011, þegar rúmlega 6000 gestir komu á safnið, bæði vegna 200 ára afmælis Jóns Sigurðssonar sem þá var haldið, og vegna þess að þá var enginn aðgangseyrir inn á sýninguna allt tímabilið. Nú

kostaði hins vegar 800 kr. inn á sýninguna pr. mann og 650 kr. fyrir ellilífeyrisþega og stóra hópa, en frítt var fyrir börn yngri en 17 ára.

## 17. júní

Eins og undanfarin þrjú ár ákvað Háskólasetur Vestfjarða að halda útskriftarhátíð sína þann 17. júní á Hrafnseyri til að fagna útskrift meistaranema í haf- og strandsvæðastjórnun. Í ár varð sú ánægulega nýbreytni að hópur fjarnema frá Háskólanum á Akureyri fagnaði einnig útskrift sinni á Hrafnseyri. En þar á meðal voru nýbakaðir viðskiptafræðingar, kennarar og hjúkrunarfræðingar. Formlega útskrifuðustu meistaranemarnir og fjarnemarnir frá Háskólanum á Akureyri þann 9. Júní, en Stefán B. Sigurðsson rektor Háskólans á Akureyri afhenti öllum útskriftarnemunum prófskírteinin á Hrafnseyri þann 17. júní. Alls útskrifuðust fjórtán nemendur úr meistaranáminu og ellefu fjarnemar. Þar að auki tók hópur hjúkrunarfræðinga þátt í athöfninni, sem útskrifaðist frá háskólanum fyrir tíu árum. Háskólahátíðin stóð frá kl. 12:15-13:15 og tóku yfir eitt hundrað manns þátt í henni að þessu sinni og hefur kapellan á Hrafnseyri aldrei verið jafn þétt setin, enda hópur útskriftarnema umtalsvert stærri en undanfarin ár þegar fjarnemar bættust í hópinn. Guðmundur Hálfðánarson, prófessor Jóns Sigurðssonar við Háskóla Íslands, stýrði athöfninni.

- Eftir háskólahátíðina yfirgaf staðinn talsverður hluti þeirra sem sérstaklega komu í tilefni hennar, þannig að nokkru færri voru í messunni, en dálítill hópur manna bættist svo við utandyra eftir messuna.

Sjálf hátíðardagskrá Hrafnseyrar á þjóðhátíðardaginn hófst svo eins og venjulega kl. 14:00 með guðþjónustu þar sem séra Fjölur Ásbjörnsson úr Holti prédikaði og Kirkjukór Þingeyrarkirkju söng. Guðmundur Hálfðánarson prófessor hélt hátíðarræðu dagsins utandyra í Bælisbrekkunni eins og vani er þegar veðrið er gott, og flutt var leikritið „Sómi Íslands, sverð og skjöldur“, eftir Svein Einarsson með leikurunum Arnari Jónssyni og Hilmarí Guðjónssyni. Kynnir var Guðni Tómasson aðstoðarmaður ráðherra í menningarmálum. Að endingu var svo öllum gestum boðið í kaffiveitingar, eins og tíðkast hefur í hvert sinn sem haldin hefur verið hátíð á Hrafnseyri, allt frá árinu 1911.

Annars einkenndist júnímánuður öðru fremur af því hversu fáir gestir skoðuðu Safn Jóns Sigurðssonar, eða 516 gestir. Hugsanlegt er, að þessi dræma aðsókn íslenskra gesta hafi stafað af því að Evrópumeistaramótið í knattspyrnu var haldið í þessum mánuði.

## Júlí

Í júlí mánuði koma flestir gestir til staðarins og því er vinnan á staðnum í mánuðinum aðallega fólgin í að sinna gestum og sjá um að staðurinn líti sómasamlega út.

Dagana 3.- 4. Júlí fór fram fornleifarannsókn á forna kirkjugarðinum í Hrafnseyrartúni . Tilgangur rannsóknarinnar var að staðfesta að um kirkjugarð væri að ræða, skoða legu, aldur og kyn beinagrinda og taka sýni til frekari aldursgreiningar. Rannsóknin er hluti rannsókna sem Náttúrstofa Vestfjarða gerir á Hrafnseyri og í Arnarfirði. Fornleifafræðingarnir Margrét Hrönn Hallmundsdóttir og Guðný Zoega mannabeinafræðingur frá Byggðasafni Skagafjarðar önnuðust rannsóknina.

Kirkjugarðurinn er eins fasa, eins og kallað er, sem þýðir að grafir hafa ekki verið teknar ofan í aðrar grafir, varðveisluskilyrði eru mjög slæm og því ekki hægt að gera meinafræðilegar rannsóknir á beinum. Niðurstaða þessara rannsókna er góð, þar sem sýni fengust til aldursgreiningar ásamt

gjóskulagi sem ætti að geta gefið hugmynd um hvenær kirkjugarðurinn var í notkun. Þar sem varðveisla beina er mjög slök eru ekki fyrirhugaðar frekari rannsóknir á garðinum, en niðurstöður aldursgreininga ætti að liggja fyrir í vetur.

### **Ágúst**

Dagana 5. - 17. ágúst dvöldust á Hrafnseyri 10 nemendur í fornleifafræði frá ýmsu háskólum í Bretlandi og Skotlandi, við uppgröft undir leiðsögn Margrétar Hallmundsdóttur fornleifafræðings frá Náttúrustofu Vestfjarða. Margrét hóf fornleifauppgröft á Hrafnseyri haustið 2011 og kom þá í ljós mikið af minjum undir sverðinum á Hrafnseyri, undir Bælisbrekku og aftan við gamla kirkjugarðinn. Vegna þessa var ákveðið að stækka uppgreftrarsvæðið sumarið 2012 til að kanna eðli og aldur þessara minja. Árið 2013 er svo fyrirhugaðar víðamiklar fjarkönnunarrannsóknir á Hrafnseyri og í Arnarfirði sem liður í rannsókninni „Arnarfjörður á miðöldum“.

Nemendurnir, 6 stúlkur og 4 drengir, létu vel af dvöl sinni á staðnum. Stúlkurnar óskuðu eftir að sofa á lofti burstabæjarins, og er þetta í fyrsta skipti í tíð núverandi staðarhaldara, sem veitt er leyfi til gistingar þar. Drengirnir sváfu hins vegar á kapelluloftinu.

### **Sumarháskólinn**

Þriggja daga námskeið, „Sumarháskóli í safnfræðslu – söfn og umhverfi sem námsvettvangur“ var svo haldið 24. – 26. ágúst. Alls sóttu 10 nemendur námskeiðið og komu þeir frá Ísafirði, Flateyri, Þingeyri, Reykjavík, Akureyri og Siglufirði. Yfir 20 nemendur til viðbótar höfðu skráð sig á námskeiðið en sögðu sig frá því alveg fram á síðasta dag. Til að koma í veg fyrir svona afföll væri rétt að krefja nemendur framvegis um ákveðið skráningargjald, þegar þeir skrá sig á námskeiðið.

Námskeiðið var haldið í samvinnu við Safnfræðideild Háskóla Íslands undir stjórn Sigurjóns B. Hafsteinssonar dósents í safnafræðum. Kennarar voru sex talsins, og komu frá Norska Húsinu í Stykkishólmi, Hönnunarsafni Íslands í Garðarbæ, Minjasafni Reykjavíkur (Landnámssýningu 871+2) og Árbæjarsafni auk Háskóla Íslands, en aðeins 3 þeirra voru launaðir af verkefninu. Guðmundur Hálfaldánarson og Sigurjón B. Hafsteinsson, voru launaðir af Háskóla Íslands, en einn kennaranna var launalaus.

## **Önnur verkefni**

### **Fundur með Prófessor Guðmundi Hálfaldánarsyni.**

12. apríl kallaði nýráðinn prófessor Jóns Sigurðssonar, Guðmundur Hálfaldánarson, Peter Weiss frá Háskólasetri Vestfjarða, Guðbjörgu Ástu Ólafsdóttur frá Rannsóknarsetri HÍ á Vestfjörðum í Bolungarvík og Aðalstein Óskarsson frá Atvinnuþróunarfélagi Vestfjarða ásamt staðarhaldara á Hrafnseyri til fundar. Þar óskaði hann eftir að heyra hvaða hugmyndir við höfðum um hvernig hann, sem nýráðinn í þessa stöðu, gæti nýst á svæðinu. Af hálfu starfseminnar á Hrafnseyri var lögð fram sú hugmynd að samstarfi, að með vísan til þess að

- gjöf ríkisstjórnarinnar og Alþingis til þjóðarinnar í tilefni 200 ára afmæli Jóns Sigurðssonar hafi verið að gera Hrafnseyri að „lifandi mennta- og menningarsetri“ eins og sagði í hátíðarræðu forsætisráðherra þann 17. Júní 2011,

- stefna fyrrverandi Hrafnseyrarnefndar hafi verið að gera staðinn að „miðstöð þverfaglegra og fjölbjóðlegra rannsókna, fræðslu og samstarfs í greinum er tengjast þjóð, þjóðerni og þjóðernisstefnu“,
- á Vestfjörðum séu nú þegar stundaðar margvíslegar rannsóknir í sögu (Ísafirði), þjóðfræði (Hólmavík), fornleifafræði (Bolungarvík), menningarfræði, mannfræði, kvennafræði, félagsfræði og fleiri greinum.

Þá geti embætti prófessors Jón Sigurðssonar aðstoðað rannsóknarfólk á svæðinu með því að stofna til vinnufunda/námskeiða, ráðstefna og fyrirlestra með þeim, undir nafni prófessorsembættisins og Hrafnseyrar, auk þess sem hann, samkvæmt starfslýsingu sinni, eigi að aðstoða Sumarháskólann á Hrafnseyri.

Í framhaldi af þessum fundi sótti Guðmundur um styrki til rannsóknarverkefnisins „Narrating the Icelandic Nation: Emerging Practices, Cultural Effects, and Political Representations“, með þátttöku rannsóknarfólks úr hinum ýmsu greinum - þar á meðal staðarhaldara Hrafnseyrar. Einnig var stofnuð fyrirlestrarröð við Háskólasetur Vestfjarða, með fyrirlesurum frá Háskóla Íslands.

### **Búlgaríuferð**

Dagana 2.- 8. september var staðarhaldari í Búlgaríu í boði Evrópuverkefnis sem unnið er undir forystu Margrétar Hallmundsdóttur fornleifafræðings, sem stjórnar samvinnuverkefni Íslands, Búlgaríu, Englands, Þýskalands og Írlands, þar sem hvert land kynnir menningu sína á ýmsan hátt fyrir hinum löndunum. Ferðin til Búlgaríu með íslenska hópnum var m.a. notuð til að kynnast stjórnendum verkefnisins og sjá í hverju verkefnið væri fólgið, því í lok maímánaðar 2013 er komið að Íslandi að kynna menningu sína og verður það m.a. gert á Hrafnseyri.

### **Fundur rannsóknarfólks á Vestfjörðum í húmanískum fræðum**

28. september boðaði staðarhaldari fólk á Vestfjörðum, sem hefur áhuga á húmanískum fræðum, til fundar á Ísafirði með Guðmundi Hálfðánarsyni, Ólafi Þ. Harðarsyni og Peter Weiss. 18 manns komu á fundinn og 3 voru viðstaddir í gegnum fjarfundarbúnað. Fundurinn leiddi til þess að á heimasíðu Hrafnseyrar hefur verið stofnuð sérstök síða/tengill með lýsingum á nokkrum rannsóknarverkefnum sem fólk er að vinna að, og kynningar á fleiri verkefnum munu bætast þar við á næstu missirum. Einnig hefur Guðmundur Hálfðánarson tekið ákvörðun um að prófessorsstaða Jóns Sigurðssonar muni veita fjárhagslega aðstoð við eitt þessara verkefna.

### **Skrifstofuaðstaða við Háskólasetur Vestfjarða**

Á fundi með Guðmundi Hálfðánarsyni og Peter Weiss þann 13. nóvember kom fram að Guðmundur ætlar að fá skrifstofuaðstöðu í Háskólasetri Vestfjarða, sem hann og aðrir starfsmenn Háskóla Íslands geta notað, þegar þeir heimsækja Ísafjörð í ýmsum erindagjörðum. Bauð hann Hrafnseyri að hafa afnot að þeirri skrifstofu, starfseminni á Hrafnseyri að kostnaðarlausu, og verður gert formlegt samkomulaga þar að lútandi innan skamms.

Í seinni hluta í nóvember hrundi harðiskur tölvunnar sem staðarhaldari notar vegna vinnu sinnar. Til allrar hamingju höfðu flest skjöl sem lúta að starfseminni verið sett á dropboz, svo ekki tapaðist allt efni af tölvunni en ýmis gögn hurfu engu að síður. Það verður að vera hægt í framtíðinni að geyma skjöl/bréf sem staðarhaldari fær á vegum Hrafnseyrar á öruggari hátt.

### **Stofnun Rögnvaldar Ólafssonar**

Þann 20. nóvember var haldinn á Ísafirði stofnfundur fyrir Stofnun Rögnvaldar Ólafssonar og var staðarhaldari á Hrafnseyri m.a. kosinn í stjórn stofnunarinnar. Ákveðið hefur verið að halda alþjóðlega tveggja daga ráðstefnu á Hrafnseyri og Ísafirði haustið 2013 á vegum stofnunarinnar. Nú þegar hafa nokkrir stjórnarfundir verið haldnir til undirbúnings þeirri ráðstefnu.

### **Nordplus horisontal**

Þann 6. desember sl. tók staðarhaldari þátt í kynningu á vegum Leonardo-stofnunarinnar á möguleikum menningarstofnana til að sækja um styrki til verkefa á sínum vegum. Í framhaldi af þessari kynningu sendi staðarhaldari bréf til Leonardo-stofnunarinnar, þar sem lýst var Sumarháskóla Hrafnseyrar í safnafræðum og spurt hvort möguleiki væri á að sækja um styrk til að kanna möguleika á samstarfi við hliðstæðar stofnanir öðrum Evrópulöndum um þróun slíkra námskeiða. Í ljós kom að slík verkefnisumsókn fellur vel að styrkjareglum Nordplus-áætlunarinnar, og var ákveðið að reyna að sækja um styrk þangað fyrir 1. mars 2013.

### **Leshópur um Hrafn Sveinbjarnarson**

Auk þess að funda með Hrafnshópi - þ.e. framkvæmdarnefnd um ráðstefnu sem haldin verður á Hrafnseyri 24. ágúst 2013 til minningar um Hrafn Sveinbjarnarson - hefur staðarhaldari unnið að undirbúningi á stofnun leshóps á komandi ári um sögu Hrafn Sveinbjarnarsonar. Þetta er gert í samstarfi við Fræðslumiðstöð Vestfjarða og Rauða krossinn á norðanverðum Vestfjörðum.

Í tilefni ráðstefnunnar um Hrafn skal þess líka getið að Ferðafélag Íslands hefur í samvinnu við Ferðafélag Ísafjarðar ákveðið að bjóða fólki upp á gönguferð milli Vatnsfjarðar í Ísafjarðardjúpi og Hrafnseyrar, en það er sú leið sem Þorvaldur Vatnsfirðingur gekk með lið sitt fyrir 800 árum til að drepa Hrafn.

Árinu 2012 lauk svo með miklu óveðri og fannfergi með tilheyrandi rafmagnsleysi, allveg eins og það byrjaði.

### **Samstarfsnet Hrafnseyrar.**

Starfsemin á Hrafnseyri kallar á samstarf við ýmsa aðila vegna þeirra verkefna, sem unnið er að, og hefur samstarfsnet vegna þessa vaxið jafnt og þétt undanfarin ár. Í skýrslu um starfsemi ársins er rétt að geta sérstaklega góðs samstarfs við eftirtaldar stofnanir vegna einstakra verkefna, en einnig mætti nefna til sögunnar nokkurn fjölda einstaklinga og stuðningsaðila, sem hafa komið að ýmsum verkefnum á staðnum.

Vegna Sumarháskólans á Hrafnseyri:

- **Háskóli Íslands – Safnfræðideild** (Sigurjón B. Hafsteinsson),
- **Norska Húsið**, Stykkishólmi (Alma Dís Kristinsdóttir safnvörður),
- **Hönnunarsafni Íslands**, Garðarbæ (Þóra Sigurbjörnsdóttir),
- **Minjasafni Reykjavíkur** (Bergsveinn Þórsson),
- **Árbæjarsafn** (Sigurlaugur Ingólfsson),

Vegna fyrirhugaðrar ráðstefnu um Hrafn Sveinbjarnarson 24. ágúst 2013.

- **Heilbrigðisvísindasvið Háskóla Íslands** (Sigurður Guðmundsson),
- **Félag áhugamanna um sögu læknisfræðinnar** (Vilhelmína Haraldsdóttir),

- **Vestfirðir á Miðöldum** (Torfi Tulinius),
- **Stofnun Árna Magnússonar** (Guðrún Nordal),
- **Fræðslumiðstöð Vestfjarða** (Ieshópur um sögu Hrafns),
- **Rauði krossinn** á norðanverðum Vestfjörðum (Ieshópur um sögu Hrafns),
- **Ferðafélag Ísfirðinga** og einstaklingar í ferðamálabransanum á Vestfjörðum.

**Prófessorembætti Jóns Sigurðssonar** við Háskóla Íslands vegna:

- fyrirlestraraðar sem haldin hefur verið í vetur á vegum prófessorembættisins og Hrafnseyrar í Háskólasetri Vestfjarða,
- hátíðarræðu Guðmundar á 17. júní sl. á Hrafnseyri,
- Sumarháskólans á Hrafnseyri, þar sem Guðmundur var einn kennara,
- fyrirhugaðar ráðstefnu á vegum Stofnunar Rögnvaldar Ólafssonar, en Guðmundur verður einn fyrirlesara,
- skrifstofuaðstöðu í Háskólasetri Vestfjarða sem prófessorembættið leigir og staðarhaldari fær afnot af yfir vetrartímann,
- samvinnu í gerð ýmissa umsókna og annarra smærri verkefna.

**Náttúrustofa Vestfjarða** - Margréti Hallmundsdóttir forleifafræðingur vegna,

- fornleifagraftar í júlí 2012 í forna kirkjugarðinum á Hrafnseyri,
- dvalar, kennslu og uppgrftar 10 erlendra fornleifafræðinema, sem dvöldust í tvær vikur á Hrafnseyri í ágúst,
- samstarfs um Evrópuverkefni sem haldið var í Búlgaríu í september 2012 og verður á Hrafnseyri í maí 2013.

### **Starfsmannahald**

Auk staðarhaldara voru eftirfarandi að störfum á liðnu sumri: Ólöf B. Oddsdóttir annaðist rekstur safnbúðar og móttöku gesta sem sumarstarfsmaður, og Svandís B. Karlsdóttir sá um kaffiveitingar í burstabæ.

## **Fjármál**

Eins og fram kemur í inngangi varð sú breyting á stjórnýslu málefna Hrafnseyrar í upphafi ársins að ábyrgð á rekstrinum var færð frá forsætisráðuneyti til mennta- og menningarmálaráðuneytis. Svonefnd Hrafnseyrarnefnd, sem hafði verið í forsvari fyrir starfseminni f.h. forsætisráðuneytis, var lögð niður, og mennta- og menningarmálaráðuneyti tók við ábyrgð nefndarinnar, m.a. ábyrgð á rekstri og fjárreiðum.

Fjárframlag til starfseminnar var ákveðið á fjárlögum ársins 14,5 m.kr. Auk þess að sinna hefðbundnum verkefnum með verðugum hætti (þ.e. hátíðarhöldum reka staðinn, sjá um að 17. júní hátíðin færi fram á sómasamlegan hátt, og halda sumarnámskeiði Sumarháskólans á Hrafnseyri o.s.frv.) var markmið rekstursins á árinu að reka staðinn með minnstkostnaður við hann yrði innan ramma fjárveitinga og tekna.

Þar sem rekstur starfseminnar á Hrafseyri árið 2011 var einkar viðamikill í tilefni af 200 fæðingarafmæli Jóns Sigurðssonar og þeim hátíðarhöldum sem tengdust því var óhægt um vik að nota það ár til samanburðar við kostnaðarþætti ársins í rekstrinum á Hrafseyri, en e.t.v. nær að bera rekstrartölur saman við árin þar á undan. Á meðfylgjandi töflu eru sýndar niðurstöður helstu rekstrarþátta í starfsemi Hrafseyrar síðustu ár:

	2009	2010	2011	2012
<b>Tekjur:</b>				
Framlög, seldar vörur og þjónusta	13.477.059	8.652.833	22.905.778	15.960.262 *
<b>Gjöld:</b>				
Safn Jóns Sigurðssonar	5.540.583	6.113.015	8.598.902	9.454.340
Þjóðhátíðardagur	471.235	555.430	7.220.258	732.501
Viðhaldskostnaður	460.009	1.152.307	2.083.898	595.810
Annar rekstrarkostn.	3.333.466	3.246.942	6.191.175	4.038.876
<b>Fjármunahreyfingar:</b>				
Tekjur / (- gjöld)	-969.139	-326.993	-236.609	0
<b>NIÐURSTAÐA REKSTRAR:</b>				
Hagnaður / (-Tap)	2.702.627	-2.741.854	-1.425.064	1.138.735

\* Tekjur af aðgangseyri voru færðar til ríkissjóðs 3.1.2013, en tilheyra rekstri ársins 2012.

Eins og fram kemur í töflunni var rekstur starfseminnar á Hrafseyri innan ramma fjárveitinga og tekna á árinu, eftir nokkurt tap á næstu tveimur árum á undan vegna 200 ára afmælis Jóns Sigurðssonar árið 2011.

## Lokaorð

Þegar litið er yfir rekstur Hrafseyrar á liðnu ári er ljóst að það hafa orðið miklar breytingar á árinu frá árunum þar á undan. Eftir að hafa verið undir stjórn Hrafseyrarnefndar, sem vann að rekstri staðarins ásamt staðarhaldara í umboði forsætisráðuneytisins undanfarin ár, rekur mennta- og menningarmálaráðuneytið nú staðinn með aðstoð staðarhaldara. Samtímis var rekstur Hrafseyrar að miklu leyti tryggður eftir að ákveðið var að auka fjárveitingu til staðarins úr 7,9 millj. kr, eins og verið hefur undanfarin mörg ár, í 14,5 millj. kr. Eigi að síður var rekstri staðarins haldið í lágmarki og ýmis verkefni komu því ekki til framkvæmda í ár. Vonandi verður þó hægt að ráðast í einhver þessara verkefna á næsta ári.

Undanfarin ár hefur Háskólasetur Vestfjarða haldið útskriftarhátíð sína þann 17. júní á Hrafseyri. Útskriftin hefur þá verið aðskilin í tíma og rúmi frá hinni eiginlegu Hrafseyrarhátíð. Vonast er til að hægt verði að innlima útskriftarhátíð Háskólasetursins inn í sjálfa hátíðardagskrá Hrafseyrar á komandi ári. Að öðru leiti fór móttaka gesta og hirðing staðarins yfir sumartímamann fram eins og undanfarin ár.

Samstarf við Náttúrustofu Vestfjarða um forneifagröft á Hrafnseyri og kennslu erlendra fornleifanema á staðnum var afar ánægjuleg þróun, sem vonandi á eftir að halda áfram. Að öðrum samstarfsaðilum ólöstuðum ber sérstaklega að nefna aukið samstarf Hrafnseyrar við Háskóla Íslands, þar sem námskeið í safnafræðum var haldið annað árið í röð í samstarfi við Safnfræðideild háskólans, og samstarf við hið nýja prófessorsembætti Jón Sigurðssonar við Háskóla Íslands sem vænta má mikils af í framtíðinni.

Sumarháskólinn á Hrafnseyri hefur nú starfað sleitulaust í 6 ár í formi námskeiða og ráðstefnuhalds. Í tilefni 200 ára afmælis Jóns Sigurðssonar ákvað ríkisstjórnin að gera Hrafnseyri að mennta- og menningarsetri, þar sem stundaðar verða alþjóðlegar rannsóknir og fræðslustarfssemi. Í ljósi þessa nýja hlutverks Hrafnseyrar er mikilvægt að þessari starfssemi Hrafnseyrar verði fundin formlegur og varanlegur farvegur í framtíðinni.

Suðureyri 5. febrúar, 2013.

Valdimar J. Halldórsson

Staðarhaldari